



元代史書 四卷

元  
代  
史料  
叢刊  
初編

黃山書社

史臣曰孛羅帖木兒與察罕帖木兒爭冀甯曲在孛羅帖木兒惠宗不察曲直而調停其事以求姑息由是孛羅帖木兒益桀驁不可制至於稱兵犯闕殺宰相辱皇后嗚乎履霜堅冰由來者漸是以君子慎之於早也

速哥蒙古氏父忽魯忽兒國王木華黎麾下卒也後隸塔海帖哥有口辯令佩銀符奏軍中機務往返未嘗失期太宗器之賜名動哥居詔動哥居奏事朝至朝入奏夕至夕入奏出金盤龍袍及宮女賜之後卒於官速哥尤壯勇憲宗命從都元帥帖哥火魯赤等伐蜀五年萬戶劉七哥阿刺魯阿力與宋兵戰於巴州失利陷敵中速哥馳入其軍奪劉七哥歸賜白金名馬及紫羅圈甲又從都元帥紐璘敗宋將劉整克雲頂山紐璘奉金銀竹箭銀銷刀使速哥入獻速哥以革爲舟夜渡馬湖江至大獲山行在所奏道梗失期帝慰遣之未幾復自涪州奏事遇宋軍於三曹山速哥眾僅百餘奮擊敗之九

年宋兵攻涪州浮橋部將火尼赤陷陣速哥力戰出之  
又白事於宗王末哥復敗宋軍於三曹山還至石羊與  
劉整遇又敗之世祖卽位賜白金弓刀鞍勒至元三年  
從行院帖赤戰於九頂山四年行省也速答兒署爲本  
軍總管從平瀘州五年立德州以速哥爲達魯花赤擢  
陝西五路四川行省左右司員外郎七年從也速答兒  
敗宋軍於馬湖江用平章政事賽典赤薦遷行尙書省  
員外郎九年建都蠻叛也速答兒請率六千人往討之  
帝從其請速哥將千人爲先鋒破黎州水尾砦攻連雲  
關克之進至建都戰於東山斬其酋布庫復與元帥入  
兒秃迎合刺軍於不魯斯河十年討礪樓諸蠻襲破連  
環城還敗宋軍於七盤山署新軍萬戶十一年賜虎符  
眞授管軍萬戶領成都高哇哥等六翼及京兆新軍教  
習水戰也速答兒進圍嘉定速哥率舟師會平康城築  
遠懷等砦守之十二年敗宋將胥萬壽於麻平旣而行

樞密院副使忽敦等軍至與也速答兒會於紅崖遣速哥守龍壩城中大震守將率舟師遁速哥追擊之斬獲甚眾遂與中使沈達罕徇瀘敘諸州皆降之進圍重慶速哥以所部兵屯白水馬湖江口十三年帝遣脫朮教化的諭宋臣使降不聽乃分兵爲五道水陸並進攻之諸軍不利惟速哥獲戰艦三百艘俘其眾百三十人涪州守將遣書納降速哥率千人往察其情僞至涪州受降而返重慶守將張萬來襲速哥一晝夜凡十八戰斬首三百餘級萬敗走未幾萬復以精兵三千人至又敗之十四年行院署爲鎮守萬戶嘉定總管府達魯花赤重慶守將趙安開門降制置使張珪遁速哥追擊之虜百餘人及船二十餘艘以功授成都水軍萬戶尋改重慶夔府等路宣撫招討兩司軍民達魯花赤十六年除四川南道宣慰使依前成都水軍萬戶鎮重慶夔施黔忠萬雲涪瀘等州十九年亦奚不薛執置順元等路軍

民宣慰司以速哥爲宣慰使經理諸蠻二十四年遷河東陝西等路萬戶府達魯花赤播州宣撫使楊賽因不花等赴闕請留之降八番金竹百餘砦得戶三萬四千悉以其地爲郡縣置順元路金竹府貴州以統之東連九溪十八峒南至交趾西至雲南咸受節制二十九年入朝加都元帥改河東陝西等處萬戶府達魯花赤三十一年僉書四川行樞密院事元貞元年行院罷速哥家居數歲卒子壽不赤襲河東陝西等處萬戶府達魯花赤同時爲紐璘也速答兒部將者有探馬赤塔海帖木兒

探馬赤禿立不歹氏從諸王沒赤征蜀後以兵從塔海紺布火魯赤紐璘諸帥紐璘攻涪州還至馬湖江宋兵連艦絕江不得進探馬赤率精兵二千擊之奪其舟以濟又於橫江嘉定宣化三縣造浮橋以達成都紐璘以爲能命將千人從萬戶昔力答克略地礪門黎雅昔力

答克卒行院帖赤以探馬赤爲萬戶領其軍中統四年授蒙古漢軍萬戶至元九年從行省也速答兒征建都獨以銳卒千五百人與建都兵戰於梅子嶺大敗之夜與速哥會直擣其營獲其輜重以歸復益兵三千人與左丞曲立吉思乘勝進攻建都降又從行院汪良臣忽敦等攻嘉定重慶瀘敘諸州以功兼重慶府達魯花赤十九年卒子伯顏襲蒙古軍萬戶戍甘州

塔海帖木兒答答里帶氏曾祖忒木勒哥世襲職領太原以西八州從都元帥塔海紺卜征蜀歿於興元祖扎刺帶嗣扎刺帶卒父拜答兒尙幼從祖扎里答朮相繼襲其職扎里從都元帥大答兒征蜀以所統軍二百人破宋軍於巴州斬首三百級答朮以西川行樞密院檄領兵三千人救礪門大敗宋軍斬首三百餘級俘百餘人以歸拜答兒旣長始以父官從行省也速帶兒征建都死軍中塔海帖木兒襲父職初從行院忽敦圍嘉定

嘉定降進圍重慶敗守將張珏塔海帖木兒力戰陷陣功最多十五年又以拔都魯軍二百人破宋軍於白水江奪戰船一俘其眾十三人升宣武將軍管軍總管從也速答兒征亦奚不辭又從征都掌蠻皆爲前鋒殺獲甚眾九溪蠻散貓大盤蠻尙木的世用等叛從行省曲立吉思帥師往討皆擒之殺其酋長頭狗等也速答兒藥刺罕率兵萬人會雲南兵討烏蒙蠻至鬧竈其酋長阿蒙率五百餘眾奔麻布塔海帖木兒以四百人追至山箐中大敗之擒阿蒙以歸二十六年又從也速答兒西征卒於軍中

列傳第六十二

新元史卷之一百六十五

賜進士出身日講起居注官翰林院侍讀國史館纂修膠州柯劭忞撰

張興祖

甯玉

張榮實

呂德

朱國寶

吳祐

安民



梁禎

張泰亨 繼祖

王守信

皇毅

靳忠

蔡珍 韓進

劉用世 世恩

蘇津

王均

季庭璋

張興祖中山無極人父林爲史天澤部將以功授金符千戶林請老興祖襲父職從察罕伐宋能以少擊眾敗宋人於虎頭關察罕壯之奏其功賜鞍馬甲冑後從史權戍鄧州宋人鈔輜重於新野之西港權使興祖將步騎數百人追之及於栲栳潭興祖令騎負一步將近敵推步下騎列陣以俟分騎爲左右翼夾擊之宋人錯愕不知所應盡殲之興祖馬踐橫尸而踞左股折輿歸賜金幣爲醫藥費宋人攻新野又敗之於白河口中統元年從史樞援東川假總管戍東安虎嘯城軍還又戍光化州禽宋將唐都統大軍圍襄陽以興祖戍萬山敗宋

援將張順從攻樊城興祖督造雲梯又燒宋人戰艦斷其襄樊之援襄陽下以功擢總管再擢懷遠大將軍副萬戶至元十一年從伯顏伐宋攻郢州黃灣堡先登矢貫左股伯顏親爲敷藥從拔沙洋新城矢中額者三換虎符從攻陽邏堡禽宋將鄭信矢貫左臂鄂漢平以阿里海涯鎮之使興祖將十六翼兵戍漢陽興祖曰吾戰是求遁留吾戍此何耶阿里海涯曰鄂漢乘輿所至衝地也非公不能守之興祖始受事宋安撫高世傑規襲鄂州從阿里海涯敗之於荆江口世傑降又從攻沙市先登戰於城上又巷戰喋血濡趺斬馘無算宋將高達以江陵降阿里海涯移軍攻潭州留興祖於鄂已而計事至潭使興祖督攻城西北三月不下或議燒其木柵興祖曰火易沃滅不如砲攻使敵不能隊立吾肉薄而登可以得志阿里海涯從之城遂拔進興祖安遠大將軍又從阿里海涯攻靖江屠之宋益衛二王立於海上

湖南羣盜蠭起相應阿里海涯使興祖討之斬賊首二千九百餘人安輯降眾二萬三千九百家常德路總管謀以城叛事覺興祖誅之進昭勇大將軍招討使歸州路達魯花赤位總管上旋移常德路達魯花赤仍招討使位總管上十七年詔興祖征羅氏鬼國會其酋納款未至而還復使討亦奚不薛降之偕其酋入覲賜衣服弓矢鞍勒興祖平生殺虎數十一日遇虎一發而踣語左右曰生虎髭剔齒可以已風拔之虎怒爪其鞞裂興祖立殺之人遂名興祖爲殺虎張至是以國語賜號拔都尋罷招討使以萬戶將眞定新軍戍衡州茶陵耒陽常甯元貞元年卒年七十五興祖負氣重然諾不可屈以威武阿里海涯大會諸將興祖腰刀行酒阿里海涯避入後閣曰張公醉矣戒左右善扶出諸將皆憚之無敢坐其上者子鑄管軍總把從興祖戰於通城陣歿史闕懷遠大將軍戍瑞州等處萬戶鵬翼僉嶺北湖南提

刑按察司事塔刺齊襲懷遠大將軍眞定新軍萬戶

甯玉孟州河陽人貌魁梧膂力絕人年十七爲權卒署孟津渡長從世祖渡江以功授百戶世祖卽位召玉充河道官疏濬玉泉河至元三年大軍攻襄樊檄玉導鄧州七里河由新野而南以通糧運襄陽圍合以玉攝萬戶府事兼管浮梁津渡教習水軍十一年伯顏渡江玉以千人導前至白河爲浮橋濟師遂拔沙陽與宋人戰於江中玉以輕舸五十艘徑奪南岸指搗戰艦分渡諸軍凡三晝夜始畢至彭蠡湖口風濤洶湧浮梁數壞玉躬督士卒植巨木爲碇伯顏立馬俟之師畢濟進及丁家洲與宋將夏貴等相持南軍舳舻蔽江伯顏使玉發四砲擊其中堅舟多覆遂大敗之拜管軍千戶佩金符伯顏入建康使玉督造戰艦分玉三十艘守龍灣口宋將姜才乘夜來攻玉潛以巨艦出其後來擊之斬獲殆盡從拔平江平江之南曰太湖有長橋爲南北要衝伯

顏使玉守之時江南甫下江海多盜賊玉密斷諸港設置輕舸巡邏以備非常賊聞風解散招集流民四萬餘家境內帖然遷管軍總管擢浙西道吳江長橋都元帥兼沿海上海戶佩金虎符二十三年以病乞歸未幾起玉從鎮南王討交趾師至安南疾甚王憫之使玉歸以子居仁襲職大德六年卒年六十七居仁襲沿海上海戶佩金虎符從討爪哇擢昭勇大將軍佩三珠虎符左軍上萬戶累擢鎮國上將軍廣東道宣慰都元帥弟居正從討交趾以功擢杭州路領海船千戶累遷僉行樞密院事

張榮實霸州保定人父進金封北平公太宗四年率所部來降太宋命爲征行萬戶六年與金將國用安戰於徐州死之榮實始以質子入宿衛授金符充征行水軍千戶九年改雄州保定新城長官後統水軍從大將察罕伐宋至淮上遇宋將呂文德敗之俘五十餘人賞銀

盃戰馬又從攻江陵略襄陽宋以舟師橫截漢水榮實力戰卻之獲戰船數十艘察罕以聞賜錦袍及銀十五斤又破宋軍於太湖賜銀百兩憲宗九年從世祖伐宋駐陽羅渡宋兵十萬舟二千橫截江中以禦我師帝以榮實習水戰命爲前鋒榮實率麾下鏖戰北岸獲宋大船二十俘二百人斬其將呂文信中統元年錄前勞授金虎符水軍萬戶仍以其子顏代爲霸州七處管民萬戶三年李璫叛榮實從史天澤討平之賜金盃及銀二百五十兩馬一匹命鎮膠西至元九年從丞相阿朮攻襄陽敗夏貴又攻樊城俘其二將賜弓矢鞍勒十一年增領新軍從丞相伯顏渡江榮實以所部先進鄂漢降論功授昭毅大將軍與萬戶宋都台等取江西又從阿里海牙攻岳州宋將高世傑降以功加昭武大將軍偕元帥宋都台圍隆興守將劉槃降又與呂師夔進逼撫州宋將密佑逆戰於進賢平敗之生獲佑撫州降十三

年授同知江西道宣慰使俄進鎮國上將軍福建道宣慰使十四年改江東道宣慰使行省參知政事命與右丞塔出安輯廣東十五年入覲帝賜酒慰勞授湖北道宣慰使諸路水軍萬戶是年卒年六十一三子顏玉珪玉襲父職爲懷遠大將軍諸路水軍萬戶至元十六年討吉安叛賊有功入朝賜金織文衣弓矢佩刀加輔國上將軍都元帥並水軍萬戶鎮黃州又與元帥唐古特改立蘄黃等路都元帥府仍管本道鎮守軍馬二十一年廣東盜起遏絕占城糧運玉討平之入朝賜金織文衣鞍勒弓刀會元帥府罷命玉充保定水軍萬戶二十二年以鄱陽湖多盜詔徙水軍萬戶府於南康明年從鎮南王脫歡征交趾二十四年王至思明州玉與湖廣行省參政樊楫亦引兵至萬劫江累戰有功二十五年將士以疾疫不能進引還且戰且行終日數十合賊據險發毒矢將士死傷過半爲賊邀遮於白藤江潮退舟

膠玉力戰身被數創投水中賊鈎致玉殺之

呂德字伯亨東平汶上人少孤貧常負其勇僞爲商賈入宋邊境掠生口宋邊將懸賞購之莫能獲至元初闊闊帶等伐宋募壯士偵淮南虛實德應募率八十四人襲破宋泗州安河口柵獲裨將三人事聞賜衣一襲後從大將烏馬爾至京師獻策招集河南達爾罕軍以備征調從之以烏馬爾爲統軍萬戶德爲千戶副之招徠降人七百餘戶行樞密院以德充壽州等處招討司鎮撫引兵渡淮抵六安野人原招降宋將轉攻安慶進泊丁家洲宋人阻江自守德擊敗之獲其將閻統制十二年行省檄德充江陰鎮江路軍民都鎮撫積前後功擢武略將軍佩金符十四年從直慰使李庭屯處婺等州永康浦江盜發德討捕之獲賊首張炎季文龍餘黨復剽龍泉庭追賊馬絀於木而踣傷股兵遂失利德反旗鳴鼓賊始駭遁論功以德攝招討司事十五年復從宣



慰使史格討龍泉賊擒賊首張三八等餘眾悉降慶元賊陳弔眼聚眾叛自稱頭陀軍德將銳卒數百夜掩其壘擒之擢武節將軍管軍上千戶二十年青田吳提刑與政和賊黃華通僞稱宋祥興五年鑄兩浙安撫司印勢張甚德與趙萬戶討之斬其將毛統制等賊潰走獲宋陳丞相僞劄及賊首黃華印榜德威名益著二十六年嵯縣賊楊震龍叛壁龍興山自稱國主僞造龍鳳法物左丞相忙兀帶調水軍萬戶虎兒哈赤討之以德充行軍都鎮撫點視諸翼兵馬德敗賊於新昌進至桃源賊眾萬餘人屯史家樓甲冑精明官軍望之失色德笑曰此鋤田夫耳何足沅吾馬足大呼陷陣賊披靡悉棄其甲冑而遁明日再戰復敗之擒其驍將張九三月德率所部與虎爾哈赤徑至龍興山瞰賊巢縱火焚之賊拔柵走四月復與萬戶土哈爾會師於天台賊首曹榮等出降六月武義永康降賊復叛德與蔡推官輕騎出